

գործունեութիւնն նոր ձև, այլ տակավին խարխափում է կովի, պայքարի ու քողոքի հին ձևերի շրջանակում:

Համաշխարհային գեղարվեստական գրականութեան մեջ ավազակ գաղափարականի տիպերը բազմաթիվ են, իսկ գաղափարական ավազակի ամենահայտնի պատկերացումը տեսնում ենք Շիլլերի «Ավազակների» մեջ: Հայոց գրականութեան մեջ ավազակ գաղափարականութեան հերոսներից ամենահռչակվածը Քաֆու քավոր Պետրոսն է («Խաչագողի հիշատակարանը»), իսկ գաղափարական ավազակի տիպը մարմնացած է նույն վիպասանի Սահրատի խմբի հերոսների կերպարանքով («Զալալեղդին»), մի խումբ, որ ճընշված ժողովրդի դիմադրական ուժի դեռևս անկատար արտահայտությունն է ցուցահանում:



Հայ իրականութեան մեջ հանդես եկած առաջին գաղափարական ավազակի մասին մեզ տեղեկություններ է տալիս Հարություն Աստվածատրյան Արարատյանը իր «Жизнь Артемия Апаратского» ինքնակենսագրության մեջ, որ լույս է տեսել Պետերբուրգում 1813 թվին և հայերեն թարգմանվել միայն 80 տարի հետո, 1892 թվին Պերճ Պոռչյանի ձեռքով: Արարատյանն առաջին հայ գաղափարական ավազակի ժամանակակիցն է, պատանի հասակում տեսել է նրան Վաղարշապատում 1791—1792 թվականին և բարերարվել նրանից: Թողնելով հիշյալ գրքից այն էջերը, որոնք վերաբերում են գաղափարական ավազակին հանդիպելու ու նրանից բարերարվելու հետաքրքրական հանգամանքներին, մեջ ենք բերում միայն այն հատվածները, որոնք անմիջաբար վերաբերում են մեր նյութին:

Ահա Արարատյանի պատմածը բառացի:

«... Մեր գյուղումն (Վաղարշապատում—Ք. Ա.) սկսեցին խոսել, թե Մերկե-Վուլբի քահանան յուր գյուղից հեռացել է, և թե պատահած ժամանակը հարկավոր է նրանից երկյուղ քաշել: Արդեն հայտնի էր, որ տերտերն ավազակութեամբ է պարապում... Մզրախ մականունով: Մզրախ նշանակում է տեգ, որը տերտերը կրում էր ձեռքին: Ճիշտ է, Մզրախն երբեմնապես պարապում էր ավազակութեամբ, միայն նա ուրիշներից նրանով էր տարբերվում, որ ինքը լինելով խիստ տաք, կրակոտ և բարկացկոտ, մի տեսակ էլ վրեժխնդիր բնավորության տեր մարդ, նա ավազակությունով առնում էր հարուստներից աղքատների վրեժը աչսպես.— որքան ձեռքից գալիս էր, հարուստներից խլում էր, տալիս աղքատներին, կարծես աչսպիսով վերադարձնում էր աղքատներին իրանց սեփականությունը, որ հարուստները յուրացրել էին: Մերկե-Վուլբեյի դառն աղքատ ժողովուրդ էին և միայն իրանց քահանայիցն էին ամենատեսակ օգնություն ստանում: Եթե քահանան ճանապարհներին պատահում էր խեղճ մարդի, նա նրան տանում էր ճանապարհ դնում մինչև անվտանգ տեղ և եթե տեղեկանում էր, որ այդ մարդը աղքատ է, կարիք ունի, օգնում էր նրան, որքան յուր հանգամանքները ներում էին: Իսկ ինքը տերտերը կողոպտված ավարից ոչինչ չէր վերցնում, բոլորն ուրիշներին էր բաժանում, այնքան լինել,